

辭

品

醉品卷之四

成都楊慎升菴著

趙元鎮

趙鼎字元鎮宋中興名相小辭婉媚不減花間蘭
畹慘結秋陰一首世皆傳誦之矣點絳脣一首云
香冷金猊夢回鴛帳餘香嫩更無人問一枕江南
恨○消瘦休文頓覺春衫褪清明近杏花吹盡薄
暮寒成陣

賀方回

賀方回浣溪沙云。鶯外紅銷一縷霞。淡黃楊柳帶
棲鴉。玉人和月折梅花。○笑撚粉香歸繡戶。半垂
羅幙護窻紗。東風寒似夜來些。此辭句句綺麗字
字清新。當時賞之。以爲花間蘭畹不及信然。近見
玉林辭選。首句二字作樓角非也。樓角與鶯外相
去何啻天壤。

孫浩然

一壅江山如畫。風物向秋瀟灑。水侵碧天何處斷。
霽色冷光相射。蓼嶼荻花洲。掩映竹籬茅舍。○雲

際客帆高掛。煙外酒旗低亞。多少六朝興廢事。盡入漁樵閑話。悵望倚層樓。寒日無言西下。此孫浩然離亭煞。辭也。悲壯可傳。

查荃透碧霄

艤蘭舟。十分端是載離愁。練波送遠。屏山遮斷。此去難留。相從爭奈。心期久要。屢變霜秋。歎人生杳似萍浮。又翻成輕別。都將深恨。付與東流。○想斜陽影裡。寥煙明處。雙槳去悠悠。愛渚梅幽香動。須採掇倩纖柔。豔歌粲發。誰傳餘韻。來說仙遊。念故

人留此遐州。但春風老去。秋月圓時。獨倚江樓。此
查荃透碧霄辭也。所謂一不爲少。

陳子高

陳子高名克天。台人有赤城辭一卷。甚工緻流麗。
草堂辭愁脉脉一篇。子高辭也。今刻失其名。

陳去非

陳去非蜀之青神人。陳季常之孫也。徙居河南。宋
南渡後。又居建業。詩爲高宗所簡注。而辭亦佳。語
意超絕。筆力排奐。識者謂其可摩坡仙之壘。非溢

美云草堂辭惟載憶昔午橋一首其閩中漁家傲
云今日山頭雲欲舉青蛟翠鳳移時舞行到石橋
聞細雨聽遠住風吹却過溪西去○我欲尋詩寬
久旅桃花落盡春無數渺渺籃輿穿翠楚悠然處
高林忽送黃鸝語又虞美人云吟詩日日待春風
及至桃花開後却匆匆又點絳唇云愁無那短歌
誰和風動梨花朶又南柯子云闌干三面看晴空
背插浮圖千尺冷煙中皆絕似坡仙語

陳去非桂花辭

茗溪漁隱曰。木犀閩中最多。路傍往往有參天合
抱者。土人以其多而不貴之。漕宇門前兩徑。自有
一二百株。至秋花盛開。籃輿行清香中。殊可愛也。
古人賦詠。惟東坡倅錢塘。八月十七日。天竺送桂
花。分贈元素詩云。月缺霜濃細葢乾。此花元屬桂
堂仙。驚峰子落驚前夜。蟾窟枝空記昔年。破裊山
僧憐耿介。練裙溪女鬪清妍。願公採擷紉幽佩。莫
遣孤芳老澗邊。陳去非有辭云。黃衫相荷翠葆層
底。八月江南風日美。弄影山腰水尾。○楚人未識

孤妍離騷遺恨千年無住菴中新夢一枝喚起幽
禪。萬俟雅言有辭云芳菲葉底誰會秋工意深綠
護輕黃怕青女霜侵憔悴開分早晚都占九秋天
花四出香七里獨步珠宮裏。○佳名巖桂却因是
遺子不自月中來。又那得蕭蕭風味霓裳舊曲休
問廣寒人飛太白。酹仙蕊香外無香比。文昌雜錄
云京師貴家多以醑醑漬酒獨有芬香而已近年
方以檳榔花懸酒中不惟馥郁可愛又能使酒味
辛烈始於戚里外人蓋所未知也。

葉少蘊

葉少蘊名夢得號石林居士妙齡秀發有文章盛
名石林辭一卷傳于世賀新郎睡起流鶯語虞美
人落花已作風前舞。皆其辭之入選者也中秋晏
客念奴嬌末句云廣寒宮殿爲余聊借瓊林英英
獨照者。

曾空青

曾祜字公衮號空青先生子宣之子清樾軒二詩
名世辭亦佳其臨江仙云後院短牆臨綠水春風

急管繁絃。向誰親、按小嬋娟。玉堂天上客。琳館地
行仙。○安得此身長。是健。徘徊夜飲。朝眠。江南刺
史。湯垂涎。安排腸已斷。何況到樽前。又菩薩蠻山
光冷浸清江底。江光只到柴門裡。臥對白蘋洲。歛
眠數釣舟。亦佳。惜全篇未稱。

曾純甫

曾覲字純甫。號海野。東都故老。見汴都之盛。故辭
多感慨。金人捧露盤是也。採桑子云。花裡遊蜂。宿
粉棲香。錦繡中。爲當時傳歌。

曾覲張掄進辭

曾覲進辭賦遂進阮郎歸云柳陰庭院占風光。呢喃春晝長。碧波新漲小池塘。雙雙蹴水忙。○萍散。湧絮飛揚。輕盈體態狂。爲憐流水落花香。銜將歸。畫梁。既登舟。知閣張掄進柳稍青云柳色初濃餘寒似水。纖雨如塵。一陣東風。縠紋微皺。碧沼鱗鱗。○仙娥花月精神。奏鳳筦鸞弦鬪新。萬歲聲中。九霞盃內。長醉芳春。曾覲和進云桃靨紅勻。梨腮粉薄。鶯徑無塵。鳳閣凌虛。龍池澄碧。芳意鱗鱗。○清

時酒聖花神。看內苑風光又新。一部仙韶。九重鸞
仗。天上長春。

雪辭

紫皇高宴仙臺。雙成戲擊琉璃。何人爲把銀河
水。剪甲兵都洗。玉樣乾坤。八荒同色。了無塵翳。喜
冰消太液。煖融鵲。端門曉班初退。○聖主憂民
深意。轉鴻鈞滿天和氣。太平有象。三官二聖。萬年
千歲。雙玉盃深。五雲樓迥。不妨頻醉。看來不是飛
花。片片是豐年瑞。太上大喜。賜鍍金酒器二百兩。

月辭

曾覲進壺中天辭云素飈漾碧看天衢穩送一輪
明月。翠水瀛壺人不到。比似世間秋別。王手瑤笙
一時同色。小按霓裳疊。天津橋上有人偷記新闕。
○當日誰幻銀橋阿瞞兒戲。一笑成痴絕。肯信羣
仙高宴處。移下水晶宮闕。雲海塵清。山河影滿。桂
冷吹香雪。何勞玉斧金甌。千古無缺。上皇大喜曰。
從來月籛不曾用金甌事。可謂新奇。賜金束帶紫
番羅。水晶盃。上亦賜寶醖。至一更五點還宮。是夜

西興亦聞天樂焉。

潮辭

江湖亦天下所獨。宣諭侍官各賦。酹江月一曲。至
晚呈上。以吳琚爲第一。其辭曰。玉虹遙挂。望青山
隱隱如一抹。忽覺天風吹海立。好似春霆初發。白
馬凌空。瓊鼇駕水。日夜朝天闕。飛龍舞鳳。鬱蔥環
拱。吳越。○此景天下應無。東南形勝。偉觀真奇絕。
好是吳兒飛綵幟。颺起一江秋雪。黃屋天臨。水犀
雲擁。看擊中流楫。晚來波靜。海門飛上明月。兩宮

賞賜無限至月上始還。

張材甫

張材甫名掄南渡故老辭多應制元夕雙闕中天
一首繇華感慨已入選矣詠瑞香花西江月剪就
碧雲團葉刻成紫玉芳心淺春不怕嫩寒侵暖徹
薰籠瑞錦。○花裡清芬獨步樽前勝韻難禁飛香
直到玉盃深。消得懽厭夜飲。又柳梢青前段云柳
色初勻。輕寒如水。纖雨如塵。一陣東風。縠紋微皺
碧沼鱗鱗亦佳足稱辭人。

朱希真

朱希真名敦儒。博物洽聞。東都名士也。天資曠遠。
有神仙風致。其西江月二首。辭淺意深。可以警世。
之役。役於非望之福者。草堂入選矣。其相見懽云。
東風吹。又江梅。揉花開。舊日吳王宮殿。長青苔。○
今古事。英雄淚。老相催。常恨夕陽西下。晚潮回。鵬。
鵠。天云。檢盡曆頭冬。又殘愛他風雪。耐他寒。拖條。
竹杖。家。家酒。上箇籃輿。處處山。○添老大。轉痴頑。
謝天教我老年間。道人還了鴛鴦債。紙帳梅花醉。

夢間其水龍吟末云奇謀報國可憐無用塵昏白羽鐵鎖橫江錦帆衝浪孫郎苦亦可知其爲人矣

李似之

李似之名彌遜仙井監人自號筠翁宋南渡名士不附秦檜坐貶有別友菩薩蠻一首云江城烽火連三月不堪對酒長亭別休作斷腸聲老來無淚傾○風高帆影疾目送舟痕碧錦字幾時來薰風無鴈回○

張孝祥字安國蜀之簡州人四狀元之一也後卜
居歷陽平昔爲辭未嘗著稿筆酣興健頃刻卽成
無一字無來處如歌頭凱歌諸曲駿發蹈厲寓以
詩人句法者也有于湖紫微雅辭一卷湯衡爲序
云云其詠物之工如羅帕分柑霜落齒冰盤剝茭
珠盈掬寫景之妙如秋淨明霞乍吐曙涼宿靄初
消麗情之句如佩解湘腰釵孤楚髻不可勝載

于湖辭

于湖玩鞭亭晉明帝覘王敦營壘處自溫庭筠賦

詩後張文潛又賦于湖曲以正湖陰之誤辭皆奇
麗警拔膾炙人口徐寶之韓南澗亦發新意張安
國賦滿江紅云千古淒涼興亡事但悲陳迹凝望
眼吳波不動楚山空碧巴滇綠駿追風遠武昌雲
旆連天赤笑老姦遺臭到如今留空壁○邊書靜
烽烟息通輶傳銷鋒鏑仰太平天子聖明無敵蹙
踏揚州開帝里渡江天馬龍爲匹看東南佳氣鬱
蔥蔥傳千億雕間采溫張語而辭氣亦不在其下
嘗見安國大書此辭後題云乾道元年正月十日

筆勢奇偉可愛。○建康實錄唐許嵩所著者亦稱
湖陰云云庭筠之誤有自來矣。

醉落魄

張于湖醉落魄辭云輕寒澹綠可人風韻閒梳束
多情早是眉峰蹙。一點秋波閒裡覩。○桃花
庭院閒妝束。銅鞮誰唱大堤曲。歸來想是櫻桃熟
不道秋千誰伴那人蹴。此辭毒蘆二字難下。○醉
落魄元曲說爲醉羅歌

史邦卿

史邦卿名達祖號梅溪今錄其萬年歡一首亦鼎
之一鬻也兩袖梅風謝橋邊猶帶陰雪過了匆匆
燈市草根青發燕子春愁未醒誤幾處芳音遼絕
煙谿上採綠人歸定應愁沁花骨○非干厚情易
歇奈燕臺句老難道離別小徑吹衣曾記故里風
物多少驚心舊事第一是侵階羅襪如今但柳髮
稀春夜來和露梳月春雪辭云行天入鏡都做出
輕鬆纖軟寒爐重暖便放慢春衫針線恐鳳鞋挑
菜歸來萬一灞橋相見此句尤爲姜堯章拈出輕

鬆纖軟。元人小令，借以詠美人足云。又元夕離羞，醉玉少年丰度。懷豔雪舊家伴侶。醉玉生春，出蘭畹。離豔雪。出韋詩，語精字鍊，豈易及耶。

杏花天

史邦卿杏花天辭云：軟波拖碧，蒲芽短。畫樓外，花晴柳暖。今年自是清明晚。便覺芳情較懶。春衫瘦。東風剪剪。逼花塢。香吹醉面。歸來立馬斜陽岸。隔水歌聲一片。姜堯章云：史邦卿之辭，奇秀清逸。有李長吉之韻，蓋能融情景於一家，會句意於兩

得姜亦當時辭手而服之如此

姜堯章

姜夔字堯章號白石道人南渡詩家名流辭極精
妙不減清真樂府其間高處有周美成所不能及
者善吹簫自製曲初則率意爲長短句然後協以
音律云其詠蟋蟀齊天樂一辭最勝其辭曰庾郎
先自吟愁賦。淒淒更聞私語。露濕銅鋪。苔侵石井。
都是曾聽伊處。哀音似訴。正思婦無眠。起尋機杼。
曲曲屏。山夜涼。獨自甚情緒。○西窗又吹暗雨。爲

誰頻斷續相和砧杵。候館吟秋。離官吊月。別有傷心無數。那詩湧與笑籬落呼燈。世間兒女。寫入琴絲。一聲聲更苦。其過茗雪云。拂雪金鞭。欺寒茸帽。不記章臺走馬。鴈磧沙平。漁汀人散。老去不堪遊冶。人目辭云。池面冰膠。牆頭雪老。雲意還又沉沉。朱戶粘雞。金盤簇燕。空歎時序。侵尋湘月。辭云。歸禽時度。月上汀洲冷。中流容與。畫橈不點清鏡。從柳子厚。絲爭不可唾之語。翻出戲張平甫。納妾云。別母情懷。隨郎滋味。桃葉渡江時。翠樓吟云。檻曲

紫紅簷牙飛翠。酒破清愁。花銷英氣。法曲獻仙音
云。過秋風未成歸計。重見冷楓紅舞。玲瓏四犯云。
輕盈喚馬。端正窺戶。酒醒明月下。夢逐潮聲去。其
腔皆自度者。傳至今不得其調。難入管弦。祇愛其
句之奇麗耳。

高賓王

高觀國字賓王。號竹屋。辭名竹屋痴語。陳造爲序。
稱其與史邦卿皆秦周之辭。所作要是不經人道。
語其妙處。少游美成亦未及也。舊本草堂詩餘選。

其玉胡蝶一首書坊翻刻欲省費潛去之予家藏
有舊本今錄于此以補遺略焉喚起一襟涼思未
成晚雨先做秋陰楚客悲殘誰解此意登臨古臺
荒斷霞斜照新夢黯微月疎砧搥難禁盡將幽恨
分付孤斟○從今倦看青鏡既遲勲業可負煙林
斷梗無憑歲華搖落又驚心想蕁汀水雲愁凝去
閒蕙帳猿鶴悲吟信沉沉故園歸計休更侵尋又
詠輜御街行云藤筠巧織花紋細稱穩步如流水
踏青陌上兩初晴嫌怕溼文鴛雙履要人送上逢

花須住。纔過處。香風起。○裙兒掛在簾兒裡。更不
把。窗兒閉。紅紅白白。簇花枝。恰稱得。尋春芳意。歸
來時。晚紗籠引道。扶下人。微醉。他如秋懷喜。遷鶯
吊。青樓永遇樂。皆佳作也。

盧申之

盧申之名祖臯。邛州人。有蒲江辭一卷。樂章甚工。
字字可入律呂。彭帥於吳江作釣雪亭。擅漁人之
窟宅。以供詩境也。約趙子野翁靈舒諸人賦之。惟
甲之擅塲。江涵鴈影。梅花瘦。四無塵。雪飛風起。夜

窓如畫。其警句也。水龍吟詠茶蘼云。蕩紅流水無聲。暮烟細草。粘天遠。低回倦蝶。往來忙燕。芳期頓懶。綠霧迷牆。翠虬騰架。雪明香暖。笑依依。欲挽春風教住。還疑是相逢晚。○不似梅妝瘦減。占人間丰神蕭散。攀條弄蕊。天涯猶記。曲闌小院。老去情懷。酒邊風味。有時重見。對枕幃。空想東牀舊夢。帶將離怨。洞仙歌詠茉莉云。玉肌翠袖。較似酴醾瘦。幾度熏醒夜窓酒。問炎州何許。清涼塵不到。冰喜剪就。○晚來庭戶悄。暗數流光細。拾芳英。黯回首。

念日暮江東。偏爲魂銷人易老。幽韻清標似舊。正
簞紋如水。帳如烟。更柰問月明。露濃時候。

劉改之辭

新來塞北。傳到真消息。赤地居民無一粒。更五單
于爭立。○維師尚父。鷹揚熊羆百萬堂堂。看取黃
金假鉞。歸來異姓真王。又云。堂上謀臣樽俎。邊頭
將士干戈。天時地利與人和。燕可伐與曰可。○今
日樓臺鼎鼐。明年帶礪山河。大家齊唱大風歌。不
日四方來賀。世傳辛幼安壽韓侂冑辭也。又一首

小陶韻聲多但談不錄近讀謝疊山文論李氏繫年錄朝野雜記之非謂乾道間幼安以金有必亡之勢願召大臣預脩邊備爲倉卒應變之計此憂國遠猷也今摘數語而曰贊開邊借劉過小辭曰此幼安作也忠魂得無冤乎故今特爲拈出

天仙子

劉改之赴試別妾天仙子云別酒醺醺渾易醉回頭來三十里馬兒不住去如飛行一鵂來牽一鵂斷送殺人山共水○是則是功名終可喜不道

恩情拋得未。梅村雪店酒旗斜。去也是。住也是。煩惱自家煩惱你。辭俗意佳。世多傳之。又小說載曹東畎赴試步行。戲作紅窓迴慰其足云。春闈期近也。望帝鄉迢迢猶在天際。懊恨這一雙脚底。一日廝趕上五六十里。○爭氣扶持我上。轉得官。歸時賞你。穿對朝靴。安排你在轎兒裡。更選對宮樣鞋兒。夜間伴你睡。其辭雖相似。而不及改之遠甚。○曹東畎名幽。字西士。

嚴仁字次山。辭名清江欸。乃其佳處。有粘雲江影。
傷千古流。不去斷魂處。之句。又長于慶壽贈行。灑
然脫俗。如壽蕭禹平云。雲表金莖珠璀璨。當日投
懷驚玉燕。文章議論壓西崑。風流姓字翔東觀。贈
歐太守云。坐嘯清香畫戟。聽丁丁滴花晴漏。棠陰
晝寂。賡賓客竹枝楊柳。送別云。相逢斜柳絆輕舟。
渚香不斷蘋花老。又窓兒上幾條殘月。斜界羅帷。
皆是當時膾炙。

吳大年

吳億字大年南渡初人元夕樓雪初消一首入選
予愛其南鄉子一首云江上雪初消暖日晴煙弄
柳條認得裙腰芳草綠魂銷曾折梅花過斷橋○
蟬鬢爲誰凋長恨含嬌卹處嬌遙想晚妝呵手罷
無聊更朱唇暖玉簫

張功甫

張功甫名鉉有玉照堂辭一卷玉照堂以種梅得
名其辭多賞梅之作其佳句如光搖動一川銀浪
九霄珂月又宿雨初乾舞梢煙瘦金絲裊粉圍香

陣擁詩仙。戰退春寒峭。皆詠梅之作。雖不驚人而
風韻殊可喜。

賀新郎

張功甫善填辭。嘗卽席作賀新郎。送陳退翁分教
衡湘云。桂隱傳盃處。有風流千巖勝韻。太丘遺譜。
玉季金崑。霄漢侶。平步鸞坡揮麈。莫便駕飛颿煙
渚。雲動精神衡岳去。向君山帝野。銷韶濩。蘭藝畹。
吊湘楚。○南湖老矣。無襟度。但樽前踉蹌醉影。帽
花顛仆。只恐清時專文教。猶貸陰山狂虜。臥玉帳。

貔貅鉦鼓。忠烈前勲。賁萬恨。望神都。魏闕奔狐兔。
呼翠袖。爲君舞。此辭首尾變化。送教官而及陰山。
狂虜。非善轉換不及此。末句呼翠袖爲君舞六字。
又能挽回結煞。非千鈞筆力。未易到此。辛稼軒有。
憑誰換取。盈盈翠袖。搵英雄淚。此末句似之。

吳子和

吳子和名禮之。錢塘人有閏元宵喜遷鶯一辭入。
選。

鄭中卿

鄭中卿名域三山人號松窓使虜回有燕谷剽聞
二卷紀虜事甚詳昭君怨詠梅一辭云道是花來
春未道是雪來香異水外一枝斜野人家○冷淡
竹籬茅舍富貴玉堂瓊榭兩地不同栽一般開興
比甚佳麗情云合是一釵雙燕却成兩鏡孤鸞樂
府多傳之。

謝勉仲

謝勉仲名懋號靜寄居士吳伯明稱其片言隻字
憂玉鏘金醞藉風流爲世所貴云其七夕鵲橋仙

一辭入選。鈞簾借月是也。若餘醒未解抹頭懶屏
裡瀟湘夢遠亦的的佳句。

趙文鼎

趙文鼎名善扛號解林居士其春遊重疊金云楚
宮楊柳依依碧。遙山翠隱橫波溢。絕豔照濃春。春
光欲醉人。○纖纖芳草嫩。微步輕羅襪。花戴滿頭
歸。遊蜂花上飛。其二玉關芳草粘天碧。春風萬里
思行客。騎馬向風嘶。道歸猶未歸。○南雲新有鴈。
望眼愁邊斷。膏沐爲誰容。日高花影重。重疊金卽

菩薩蠻也。又十拍子一闕亦佳。

趙德莊

趙德莊名彥端。有介菴辭一卷。清平樂一首云。桃
根桃葉。一樹芳相接。春到江南二三月。迷損東家
蝴蝶。○殷勤踏取春陽。風前花正低昂。與我同心
梔子。報君百結。丁香爲集中之冠。

易彥祥

易彥祥字彥祥。長沙人。寧宗朝解褐狀元。草堂辭。驀
山溪。海棠枝上。畱取嬌鶯語。其所作也。

李知幾

李石字知幾號方舟蜀之井研人文章盛傳有續博物志辭亦風致草堂選煙柳疎疎人悄悄其夏夜辭也贈官妓辭有暖玉倚香愁黛翠勸人須要人先醉問道明朝行也未猶自記燈前背立偷垂淚好事者或改偷爲佯

危逢吉

危逢吉名禎有吳齋辭一卷其詠筌篴漁家傲云老去諸餘情味淺詩情不上閒欵釧寶幌有人紅

兩層簾間見紫雲元在深深院○十四條弦音調
遠柳絲不隔芙蓉面秋入西窓風露晚歸去懶酒
酣一任烏巾岸按箏篌本二十三弦十四弦蓋後
世從省非古制矣

劉巨濟

劉涇字巨濟簡州人文曰前漢集其夏初臨辭小
橋飛蓋入橫塘今刻本飛下落一蓋字

劉巨濟僧仲殊

張樞言龍圖守杭一日湖上開宴劉涇巨濟僧仲

殊在焉。樞言命卽席作填辭。巨濟先倡曰：憑誰好
筆橫掃素練三百尺。天下應無此是錢塘湖上圖。
仲殊應聲曰：一般奇絕雲淡天高秋夜月。費盡丹
青只這些兒畫不成。樞言又出梅花邀二人同賦。
仲殊曰：江南二月猶有枝頭千點雪。邀上方樽却
占東君一半春。巨濟曰：樽前眼底南國風光都在
此。移過江來從此江南不復開。乃減字木蘭花調
也。

劉叔擬名仙倫。廬陵人。號招山。樂章爲人所贈。炙
其賞牡丹賀新郎。誰把天香和曉露。倩東風。特地
勻芳臉。隔花聽取提壺。勸道此花過了。春歸蝶愁
鶯怨。最佳而結句意俗。秋日念奴嬌云。西風何事。
爲行人。掃蕩煩襟如洗。垂漲蒸瀾。都捲盡。一片瀟
湘清泚。酒病驚秋。詩愁入髻。對景人千里。楚宮故
事。一時分付流水。○江上買取扁舟。排雲湧浪。直
過金沙尾。歸去江南丘壑處。不用重尋月姊。風露
杯深。芙蓉裳冷。笑傲煙霞裡。草廬如舊。臥龍知爲。

誰起。此首絕佳。又有繫裙腰一辭。云山兒蠢蠢水
兒清。船兒似葉兒輕。風兒更没人情。月兒明。厮合
湊。送人行。○眼兒款款淚兒傾。燈兒更冷。清清。適
逢雁兒。又沒前程。一聲聲。怎生得夢兒成。此詩辭
儂薄而意優柔。亦柳永之流也。

洪叔璚

洪叔璚名茶。自號空同。辭客其瑞鶴仙云。聽梅花
吹動。涼夜何其。明星有爛。相看淚如霰。問而今去
也。何時會面。匆匆聚散。便作秋鴻社燕。寢傷心。夜

來枕上斷雲零雨何恨。○因念人生萬事回首悲涼。都成夢幻。芳心繾綣。空惆悵。巫陽館。况船頭一轉。三千餘里。隱隱高城不見。恨無情。春水連天。片帆似箭。詠新月。南柯子云。柳浪搖晴。沼荷風度。晚簷碧天如水。印新蟾。一罌清光斜露。玉纖纖。○寶鏡微開。匣金鈎未押簾。西樓今夜有人。懽應傍妝臺。低照畫眉尖。水宿菩薩蠻云。斷虹遠。飲橫江水。萬山紫翠斜陽裏。繫馬短亭西。丹楓明酒旗。○浮生長客路。事逐孤鴻去。又是月黃昏。寒燈人閉門。

其餘如笑捐瓊珮遺交甫肯把文梭擲幼輿花上
蝶水中鳬芳心密意兩相於用事用韻皆妙又合
數松兒分香栢子總是牽情處用唐詩樓頭擊鼓
轉花枝席上藏闌握松子事也全篇如月華清水
龍吟驀山溪齊天樂皆不減周美成不盡錄也

馮偉壽

馮偉壽名文子號雲目辭多自製腔草堂辭選其
春風惡劣把數枝香錦和鶯吹折一首又春風裊
柳其自度曲也被梁間雙燕話盡春愁朝粉謝午

花柔。倚紅闌。故與蝶。園蜂。繞。柳絲無數。飛上搔頭。
鳳管聲圓。蠶房香暖。笑挽羅衫須少。留隔院蘭馨。
趁風遠。鄰牆桃影。伴烟收。○紫子風情未減。眉頭
眼尾。萬千事。欲說還休。薔薇刺。牡丹毬。殷勤記省。
前度綢繆。夢裡飛紅。覺來無覓。望中新綠。別後空
稠。相思難偶。歎無情。明月。今年已見。三度如鉤。殊
有前宋秦晁。風豔比之。晚宋酸餽。味教督氣不侔
矣。餘句如笑呼銀漢入金鯨。臨邛高叟菴。列爲麗
句圖云。

吳夢窗

吳夢窓名文英字君特四明人陰君煥序其辭云
求辭於吾宋前有清真後有夢窗此非煥之言四
海之公言也其聲聲慢一辭云檀藥金碧婀娜蓬
萊遊雲不蘸芳洲露柳霜蓮十分點綴殘秋新彎
畫眉未穩似含羞低度牆頭愁送遠駐西臺車馬
共惜臨流○知道池亭多宴掩庭花長是驚落泰
謳膩粉闌干猶聞凭袖香畱輸他翠漣拍甃瞰新
妝終日凝眸簾半捲戴黃花人在小樓蓋九日晏

侯家園作也。

玉樓春

吳夢應玉樓春云。茸茸狸帽遮梅額。金蟬羅剪胡
袖窄。肩與爭看小腰身。倦態強隨聞鼓笛。○問稱
家在城東陌。欲買千金應不惜。歸來困頓滯春眠。
猶夢婆婆斜趁拍。深其意態者也。

王實之

王邁字實之。號臞菴。莆陽人。丁丑第四人。及策劉
後村贈之辭云。天壤王郎。數人物。方今第一。談笑

裡風霆驚坐。雲煙生筆。落落元龍湖海氣。琅琅董
相天人策。其重之如此。余又見翰苑新書。劉後村
與王實之四六啓云。聲名早著。不數黃香之無雙。
科目小低。猶壓杜牧之第五。元化孕此五百年之
間氣。同輩立于九萬里之下風。又云。朱雲折檻。諸
公慙請劍之言。楊子哭庭。千載裝裂席之語。一葉
身輕。何去之勇。六丁力盡。而挽不回。有謫仙人駿
馬名姬之風。無杜少陵冷炙殘杯之態。麗人歌陶
秀實郵亭之曲。好事繪韓熙載夜宴之圖。擁通德

而著書命便了以沽酒云云觀此實之蓋進則志
鯁退則豪俠元龍太白一流人也可補史氏之遺

馬莊父

馬莊父字子嚴號古洲建安人有經學多論著填
辭其餘事也草堂辭選其春遊歸朝權一首餘如
月華清云悵望月中仙桂問竊藥佳人與誰同歲
賀聖朝云遊人拾翠不知遠被子規呼轉阮郎歸
結句云三三兩兩舴舺兒人歸春也歸元夕辭云
玉梅對妝雪柳鬧蛾兒象生嬌顫可考見杭都節

物

萬俟雅言

萬俟雅言精於音律自號辭隱崇寧中充大晟府
製撰按月用律進辭故多新聲草堂選載共三臺
及梅花引二首而已其大聲集多佳者山谷稱之
爲一代辭人黃玉林云雅言之辭發妙音於律呂
之中運巧思於斧鑿之外蓋辭之聖也今約載其
二篇昭君怨云春到南樓雪盡驚動燈期花信小
雨一番寒倚闌干○莫把闌干倚○一望幾重煙水

何處是京華。暮雲遮。卓牌兒云、東風絲楊天如畫。
出清明院宇。玉豔淡泊。梨花帶月。燕支零落。海棠
經雨。單衣怯黃昏。人正珠簾笑語。相並戲蹴秋千。
共攜手。同倚闌干。暗香時度。○翠窗繡戶。路繚繞。
潛通幽處。斷魂凝佇。嗟不似飛絮。閒悶閒愁。難消
遣。此日年年。意緒無據。奈酒醒春去。

黃玉林

黃玉林，名昇，字叔陽，有散花菴人，止稱花菴云。嘗
選唐宋辭，名曰絕妙辭選，與草堂詩餘相出入。今

草堂辭刻本多誤字及失名氏者賴此可證此本

世亦罕傳予得錄于王吏部相山子

名嘉賓

玉林之

辭附錄卷尾凡四十首草堂辭選其二南山未解

松梢雪及枕鐵稜稜近五更是也然非其佳者其

月照梨花一首云晝景方永重簾花影好夢猶酣

鶯聲喚醒門外風絮交飛送春歸○脩蛾畫了無

人問幾多別恨淚洗殘粉不知郎馬何處嘶煙草

萋迷鷓鴣啼此首有花間遺意又賀新郎梅辭云

自掃梅花下問梢頭冷盡疎疎幾時開也問者闕

焉今久矣。多少幽懷欲寫。有誰是孤山流亞。香月
一聯真絕唱。與詩人千載爲嘉話。餘興味付來者。
清癯不戀雕闌榭。待與君白髮相懽。竹籬茅舍。幸
甚今年無酒禁。溜溜小槽壓蔗已準。擬霜天雪夜。
自醉自吟。仍自笑。任解冠落珮。從嘲罵。書此意寄
同社。此辭用文句入音律。而不酸。宋辭之體也。其
餘若九日辭。蘭佩秋風冷。茱囊曉露新。秋懷辭。月
印金樞曉未收。夜涼辭。冰雪襟懷。瑠璃世界。夜氣
清如許。暮春辭。戲臨小草書團扇。自揀殘花。插淨。

瓶又夜來能有幾多寒。已瘦了梨花一半。贈丁南
鄰云。待踞鼃食蛤。相期汗漫。與煙霞會。用盧敖事
也。見淮南子。

評稼軒辭

廬陵陳子宏云。蔡光工于辭。靖康中。陷虜庭。辛幼
安嘗以詩辭謁之。蔡曰。子之詩則未也。他日當以
辭名家。故稼軒歸宋。晚年辭筆尤高。嘗作賀新郎。
云。綠樹聽啼鴉。更那堪。杜鵑聲住。鷓鴣聲切。啼到
春歸無啼處。苦恨芳菲都歇。算未抵。人間離別。馬

上琵琶。開塞黑。更長門。翠輦辭金闕。看燕燕送歸
妾。○將軍百戰身名裂。向河梁。回頭萬里。故人長
絕。易水瀟瀟西風冷。滿座衣冠似雪。正壯士悲歌
未徹。啼鳥還知如此恨。料不啼清淚空啼血。誰伴
我。醉明月。此辭盡集許多怨事。全與李太白擬恨
賦手段相似。又止酒沁園春云。杯汝前來。老子今
朝點檢形骸。甚長年抱渴咽。如焦釜。于今喜溢氣
似奔雷。漫說劉伶古今達者。醉後何妨死便埋。如
此歎。汝於知己。真少恩哉。○更憑歌舞爲媒。算合

作平居。鳩毒猜。况怨無大小。生於所愛。物無美惡。
遇則爲災。與汝成言。勿畱函去。吾力猶能肆汝杯。
杯再拜道。麾之卽去。招則須來。此又如賓戲解嘲。
等作。乃是把作古太手段。寓之於辭。賦築偃湖云。
疊嶂西馳。萬馬回旋。衆山欲東。正驚湍直下。跳珠
倒濺。小橋橫截。新月初弓。老合投閒。天教多事。檢
校長身。十萬松。吾廬小在龍蛇影外。風雨聲中。爭
先見面。重重看爽氣。朝來二四峰。似謝家子弟。衣
冠磊落。相如庭戶。車騎從容。我覺其間。雄深雅健。

如對文章太史公新堤路。問偃湖何日。煙水濛濛。
且說松而及謝家相如太史公。自非脫落故常者。
未易闖其堂與。劉改之所作沁園春。雖頗似其豪。
而未免於粗。近日作辭者。惟說周美成姜堯章。而
以東坡爲詩辭。稼軒爲辭論。此說固當。蓋曲者曲
也。固當以委曲爲體。然徒狃於風情婉變。則亦易
厭。回視稼軒所作。豈非萬古一清風哉。或云周姜
曉音律。自能撰辭調。故人尤服之。

辭品卷之五

成都楊慎升菴著

虞美人草

賈氏談錄云、褒斜谷中、有虞美人草、狀如雞冠花、葉相對、益州草木記云、雅州名山縣、出虞美人草、唱虞美人曲、應拘而舞、酉陽雜俎云、舞草出雅州、益州方物圖贊、虞作娛、唐人舊曲云、帳中草草軍情變、月下旌旗亂、攬衣推枕、愴離情、遠風吹下楚歌聲、正三更、烏鵲欲上、重相顧、豔態花無主、手中

蓮。鐔。凜。秋。霜。九。泉。歸。去。是。仙。鄉。恨。茫。茫。宋。黃。載。萬。
和。云。世。間。離。恨。何。時。了。不。爲。英。雄。少。楚。歌。聲。起。霸。
圖。休。野。葛。荒。葵。老。吳。城。暮。玉。貌。知。何。處。至。今。芳。草。
解。婆。娑。只。有。當。時。魂。魄。未。消。磨。

竝蒂芙蓉辭

宋政和癸巳、大晟樂成、嘉瑞旣生、蔡元長以晁端
禮次膺薦於徽宗、詔乘驛赴闕、次膺至都下、會禁
中嘉蓮生、異苞合、跌屢出、天造人意、有不能形容
者、次膺效樂府體屬辭以進、名竝蒂芙蓉、上覽之、

稱善除大晟樂府協律郎。不克受而卒。其辭云。大
液波澄。何檻中照影。芙蓉同蒂。千柄綠荷深竝。丹
臉爭媚。天心眷臨聖日。殿宇分明敞嘉瑞。弄香嗅
蕊。願君王壽與南山齊比。○池邊屢回翠輦。擁羣
仙醉賞。憑闌凝思。萼綠攬飛瓊。共波上遊戲。西風
又看露下。更結雙雙新蓮子。鬪裝競美。問此央向
誰畱意。不惟造語工緻。而曲名亦新。故錄于此。然
大臣諛。小臣候。不亡何俟乎。

宋徽宗辭

宋徽宗北隨金虜後見杏花作燕山亭一辭云裁
剪冰綃輕疊數重冷淡燕脂注新樣靚妝豔溢香
融羞殺蕊珠宮女易得凋零更多少無情風雨愁
苦閒院落淒涼幾番春暮○憑寄離恨重重這雙
燕何曾會人言語天遙地遠萬水千山知他故宮
何處怎不思量除夢裡有時曾去無據和夢也有
時不做辭極淒惋亦可憐矣又在北過清明日詩
曰茸母初生認禁煙草名無家對景倍淒然帝城
春色誰爲主遙指鄉關涕淚連又戲作小辭云孟

婆孟婆。你做些方便。吹箇船兒倒轉。孟婆。宋汴京勾欄語。謂風也。
茸母孟婆。正是的對。

孟婆

俗謂風曰孟婆。蔣捷辭云。春雨如絲繡出花枝紅。
梟怎禁他孟婆合皂。宋徽宗辭云。孟婆好做些方
便。吹個船兒倒轉。江南七月間有大風。甚於船艣。
野人相傳以爲孟婆發怒。按此齊李駒駢聘陳問
陸士秀。江南有孟婆。是何神也。士秀曰。山海經帝
之二女遊於江中。出入必以風雨自隨。以帝女故

曰孟婆猶郊祀志以地神爲泰媼此言雖鄙俚亦自有來矣

憶君王

徽宗被虜北行謝克家作憶君王辭云依依宮柳拂宮牆。宮殿無人春晝長。燕子歸來依舊忙。憶君王。月照黃昏人斷腸。忠憤之氣寓于聲律宜表出之其調卽憶王孫也

陳敬叟

陳敬叟名以莊號月溪有水龍吟一首自注記錢

使陳敬明為

宋人則此詞

亦太不恭

屈元人施之

勝國老婦

非此言之休

塘之恨。蓋謝太后隨北虜去事也。其辭曰。晚來江
闊潮平。越船吳榜。催人去。稽山滴翠。胥濤濺恨。一
襟離緒。訪柳章臺。問桃仙圃。物華如故。向秋娘渡
口。秦娘橋畔。依稀是相逢處。○窈窕青門紫曲舊
羅衣。新番金縷。仙音恍記。輕攏慢撚。哀絃危柱。金
屋難成。阿嬌已遠。不堪春暮。聽一聲杜宇。紅殷綠
老。雨花風絮。是時謝太后年七十餘。故有金屋阿
嬌。不堪春暮之句。又以秋娘秦娘比之。蓋惜其不
能死也。有愧於苻登之毛氏。竇建德之曹氏多矣。

同時孟鯉有折花怨云。匆匆杯酒。又天涯。晴日。墻東。叫賣花。可惜。同生不同死。湯隨春色去。誰家。鮑。輓亦有詩云。生死雙飛亦可憐。若爲白髮上征船。未應分手江南去。更有春光七十年。噫。婦人不足責。誤國至此者。秦檜賈似道。可勝誅哉。

陳剛中辭

天台陳剛中孚在燕。端陽日。當母誕。作太常引二章云。綵絲堂上簇蘭翹。記生母在今朝。無地捧金焦。奈煙水龍沙路遙。碧天迢遞。白雲何處。急雨蕭蕭。

蕭○萬○里○夢○魂○消○待○飛○逐○錢○塘○夜○潮○其○二○短○衣○孤○劍○
客○乾○坤○奈○無○策○報○親○恩○三○載○隔○晨○昏○更○疎○雨○寒○燈○
斷○魂○赤○城○霞○外○西○風○鶴○髮○猶○想○倚○柴○門○蒲○醅○漫○盈○
樽○倩○誰○寫○青○山○淚○痕○時○爲○編○脩○云○

惜分釵

呂○聖○求○惜○分○釵○一○辭○云○春○將○半○鶯○聲○亂○柳○絲○拂○馬○
花○迎○面○小○堂○風○暮○樓○鐘○草○色○連○雲○暝○色○連○空○重○重○
○秋○千○畔○何○人○見○寶○釵○斜○照○春○妝○淺○酒○霞○紅○與○誰○
同○試○問○別○來○近○日○情○悵○悵○此○辭○妙○在○促○韻○

鄒志完陳瑩中辭

復齋湧錄云鄒志完徒昭陳瑩中貶廉間以長短句相諧樂有箇胡兒模樣別滿領髭須生得渾如漆見說近來頭也白髭須那得長長黑逸一句籊子摘來須有千莖雪莫向細君容易說恐他嫌你將伊摘此瑩中語謂志完之長髭也有箇頭陀脩苦行頭上頭髮毵毵身披一幅黦裙衫緊纏雙脚苦要遊南開說度牒朝夕到并除領下髭髻鉢中無粥住無菴摩登伽處只恐却重參此志完語謂

瑩中之多愁也。廣陵馬推官往來二公間，亦嘗以詩辭贈之。有才何事老青衫。十載低回北斗南。肯伴雪髯千日醉。此心真與古人參。今見故人今幾年。年來風物尚依然。遙知閒望登臨處。極目江湖萬里天。志完語也。一樽薄酒。滿酌勸君。君舉手。不。是朋親。誰肯相從寂寞濱。人生似夢。夢裡惺惺。何處用。醖到休辭。醉後全勝未醉時。瑩中語也。初志完自元符間貶新州。徽宗卽位。以中書舍人召。未幾謫零陵別駕。龍水安置。未幾徙昭焉。

辭識

復齋漫錄云、鄧肅謂余曰、宣和五年初復九州、天下共慶、而識者憂之也、都下盛唱小辭曰、喜則喜、得入手、愁則愁、不長久、懽則懽、我兩個厮守、怕則怕、人來破鬪、雖三尺之童皆歌之、不知何謂也、七年九州復陷、豈非不長久也、郭藥師契丹之帥也、我用以守疆、啓敵國禍者、郭爾非破鬪之驗耶、

無名氏撲蝴蝶辭

茗溪漁隱曰、舊辭高雅、非近世所及、如撲蝴蝶一

辭不知誰作。非惟藻麗可喜。其腔調亦自婉美。辭云。煙條雨葉。綠遍江南岸。思歸倦客。尋芳來較晚。岫邊紅日初斜。陌上花飛正滿。淒涼數聲羌管。怨春短。○玉人應。在明月樓中。畫眉懶。蠻牋錦字。多時魚鴈斷。恨隨去水。東流事與行雲共遠。羅衾舊香猶煖。

曹元寵辭

蒼溪漁隱曰。曹元寵本善作辭。特以紅窓迥戲辭。盛行於世。遂掩其名。如望月婆羅門一辭。亦豈不

佳辭云漲雲暮捲漏聲不到小簾櫳銀河淡掃澄
空皓月當軒高挂秋入廣寒宮正金波不動桂影
朦朧○佳人未逢歎此夕與誰同望遠傷懷對景
霜滿秋紅南樓何處想人在長笛一聲中凝淚眼
立盡西風此辭語病在霜滿秋紅之句時太早爾
冒端伯編雅辭乃以此爲楊如晦作非也

王采漁家傲辭

復齋漫錄云王采輔道觀文韶子也徽宗朝妄奏
天神降于家卒以此受禍人以其父熙河妄殺之

報爾嘗爲漁家傲辭云。日月無根。天不老。浮生總被消磨了。陌上紅塵常擾擾。昏復曉。一場大夢誰先覺。○洛水東流山四遶。路傍幾個新華表。見說在時官職好。爭信道。冷煙寒雨埋荒草。

洪覺範浪淘沙

冷齋夜話云。予畱南昌。久而忘歸。獨行無侶。意緒蕭然。偶登秋屏閣。望西山。於是浩然有歸志。作長短句寄意。其辭曰。城裡久偷閒。塵浣雲衫。此身已是再眠蠶。隔岸有山歸去好。萬壑千岩。○霜晚更

凭欄減盡晴嵐。微雲生處是茅菴。試問此生誰作
伴。彌勒同龕。

洪覺範禪師贈女真辭

復齋漫錄云。臨川距城南一里。有觀曰魏壇。蓋魏
夫人經遊之地。具諸顏魯公之碑。以故諸女真嗣
續不絕。然而守戒者鮮矣。陳虛中崇寧間守臨川。
爲詩曰。夫人在兮若冰雪。夫人去兮仙蹤滅。可惜
如今學道人。羅裙帶上同心結。洪覺範嘗以長短句
贈一女真云。十指嬌抽春筍。纖纖玉軟紅柔。人

前欲展強嬌羞微露雲衣霓袖。○窈好洞天春曉。
黃庭卷罷清幽。凡心無計奈閒愁。試撚花枝頻嗅。
錢思公辭

侍兒小名錄云錢思公謫漢東日撰玉樓春辭曰
城上風光鶯語亂城下煙波春拍岸。綠楊芳草幾
時休。淚眼愁腸先已斷。○情懷漸變成衰晚。鸞鏡
朱顏驚暗換。往年多病厭芳樽。今日芳樽惟怨淺。
每酒闌歌之則泣下。後閣有白髮嫗乃鄧王謫鬟
驚鴻也。遽言先王將薨預戒挽鐸中歌木蘭花引

緋爲送。今相公亦將亡乎。果薨於隨州。鄧王舊曲。
亦嘗有。帝鄉煙雨鎖春愁。故國山川驚淚眼。之句。

劉後村

劉克莊字潛夫。號後村。有後村別調一卷。大抵直
致近俗。效稼軒而不及也。夢方孚若沁園春云。何
處相逢。登寶釵樓。訪銅雀臺。喚厨人斫就東溟鯨。
鱠。圍人呈罷。西極龍媒。天下英雄。使君與操。餘子
誰堪共酒杯。車千乘。載燕南代北。劍客奇才。○餘
酣。畫鼓如雷。誰信被晨雞催。喚回。歎年光過盡。功

名未立。書生老去。機會方來。使李將軍遇高皇帝。
萬戶侯何足道哉。推衣起。但淒涼感舊。慷慨生哀。
舉一以例。他辭類是。其詠菊念奴嬌後段云。嘗試
銓次羣芳。梅花差可伯仲之間爾。佛說諸天金色
界。未必莊嚴如此。尚友靈均。定交元亮。結好天隨
子。離邊坡下。一杯聊泛霜盞。亦奇甚。送陳子華帥
真州云。記得太行兵百萬。曾入宗爺駕御。今把做
握蛇騎虎。堪笑書生心膽怯。車中閉置如新嬾。空
目送孤鴻去。壯語亦可起懦旅。中浪淘沙云。紙帳

素屏遮。全似僧家。無端霜月闌。幽紗驚起玉關。狂
戍夢。幾疊寒笳。○歲晚客天涯。鬢髮蒼華。今年衰
似去年。夢詩酒近來都減。價孤負梅花。見天機餘
錦。

劉伯寵

劉伯寵名褒。一字春卿。其辭多俊語。元夕云。金猊
戲掣星橋鎖。絳紗萬炬。玉梅千朶。羯鼓喧空。鴈弦
沸曉。櫻桃微破。春日旅况云。遺策誰家蕩子。唾花
何處新妝。流紅有恨。拾翠無心。往事淒涼。紅淚不

勝。閨。怨。白。雲。應。老。他。鄉。送。別。云。紅。枕。臂。香。痕。未。落。
舟。橫。岸。作。計。匆。匆。愁。如。織。斷。腸。啼。鵲。饒。舌。訴。東。風。

劉叔安

劉叔安名鎮號隨如。元夕慶春澤一首入草堂選。
又有阮郎歸云。寒陰漠漠夜來霜。階庭風葉黃。歸。
鷗。數。點。帶。斜。陽。誰。家。砧。杵。忙。○。燈。弄。幌。月。侵。廊。熏。
籠。添。寶。香。小。屏。低。枕。怯。更。長。和。雲。入。醉。鄉。亦。清。麗。
可。誦。其。詠。茉莉云。月。浸。闌。干。天。似。水。誰。伴。秋。娘。窓。
戶。評。者。以。爲。不。言。茉莉。而。相。像。可。得。他。花。不。能。承。

當也。又春宴云：庭花弄影，一簾香月。涓涓有富貴，
蘊籍之味。餞元宵，餞春二辭，皆奇。南渡填辭，鉅工也。

施乘之

施乘之號楓溪。野外元夕云：休言冷落山家。山翁
本厭繁華。試問蓮燈千炬，何如月上梅花。高情可
想也。

戴石屏

戴石屏名復古，字式之，能詩。江湖四靈之一也。辭
一卷，惟赤壁懷古滿江紅一首，句有萬炬臨江貌。

虎噪千艘烈炬魚龍舞。幾度東風吹世換。千年往事隨潮去。而全篇不稱臨江仙一首。差可見予所選百非明珠。餘無可取者。方虛谷議其胸中無百字成誦書故也。

張宗瑞

張宗瑞。邠陽人。號東澤。辭一卷。名東澤綺語。債其辭皆倚舊腔。而別立新名。亦好奇之過也。草堂辭選其疎簾淡月一篇。卽桂枝香也。予愛其垂楊碧一篇。卽謁金門。其辭云。花半濕。睡起一窗晴色。千

聖江南空。咫尺醉中歸夢直。○前度蘭舟送客。雙
鯉沉沉消息。樓外垂楊如此碧。問春來幾日。

李公昂

李公昂名昂英號文溪資州磐石人送太守辭有
脚豔陽難駐一辭得名然其佳處不在此文溪全
集予家有之其蘭陵王一首絕妙可並秦周其辭
云燕穿幙春在深深院落單衣試龍沫旋熏又怕
東風曉寒薄別來情緒惡瘦得腰圍柳弱清明近
正似海棠怯雨芳疎任飄泊○釵留去年約恨易

老嬌鶯多誤靈鵲碧雲杳杳天涯各望不斷芳草
又迷香絮迴文強寫字屢錯淚欲注還閣○孤酌
住春脚便彩局誰懽寶軫慵學階除拾取飛花嚼
是多、少、春、恨、等、閒、吞、却、猛、拍、闌、干、嘆、命、薄、悔、舊、諾、

陸放翁

放翁辭纖麗處似淮海雄慨處似東坡其感舊鵲
橋仙一首華燈縱博雕鞍馳射誰記當年豪舉酒
徒一半取封侯獨去作江邊漁父○輕舟八尺低
蓬三扇占斷蘋洲煙雨鏡湖自屬閒人又何必官

家賜與英氣可掬流落亦可惜矣其墜鞭京洛解
珮瀟湘欲歸時司空笑問漸近處丞相嗔狂真不
減少游。

張東父

張震字東父號無隱居士蜀之遂寧人也孝宗朝
爲諫官有直聲孝宗稱其知無不言言無不當光
宗朝以數直言去位時稱王十朋去自爲之空張
震去臺爲之空一代名臣也而其辭婉媚風流乃
知賦梅花者不獨宋廣平也其驀山溪青梅如豆

一首草堂入選而失其名氏

天風海濤

趙汝愚題鼓山寺云幾年奔走厭塵埃此日登臨
亦快哉江月不隨流水去天風常送海濤來朱晦
翁摘詩中天風海濤字題扁人不知其爲趙公詩
也嚴次山有水龍吟題於壁云颶車飛上蓬萊不
須更跨琴高鯉剗然長嘯天風傾洞雲濤無際我
欲乘桴從茲浮海約任翁起辨虹竿千丈轄鉤五
十親點對連鰲餌○誰榜佳名空翠紫陽仙去騎

箕尾銀鈎鐵畫龍。拏鳳翥。留人間。世更憶東山。一曲霑襟淚到而今。幸有高庭遺愛。寓甘棠意。此辭前段言江山景。後段紫陽仙去。指朱文公東山甘棠。指趙公也。趙詩朱字嚴辭。可謂三絕。特記于此。

劉篁嶸

劉圻父字子寰。號篁嶸。早登朱文公之門。居麻沙。有文集行世。其玉樓春云。今來古往長安道。歲歲榮枯原上草。行人幾度到江濱。不覺身隨楓樹老。○蒲花易晚。蘆花早客。裏光陰如過鳥。一般垂柳。

短長亭。去路不如歸路好。頗有警悟。觀泉二句云。
靜坐時看松鼠飲。醉眠不礙山禽浴。亦新。

劉德脩

劉光祖字德脩。號後溪。蜀之簡州人。有鶴林文集。
小辭附焉。其醉落魄云。春風開者。一時還共春風。
謝柳條送我。今槐夏不飲香醪。孤負人生也。○曲
塘泉細幽琴寫。胡牀滑簟應無價。日遲睡起簾鉤
挂。何不歸與花竹秀而野。

潘庭堅

潘昉字庭堅號紫巖乙未何鼎榜及第第三人美
姿容時有該云狀元真何郎榜眼真郭郎探花真
潘郎也庭堅以氣節聞於時辭止南鄉子一首草
堂所選是也首句生怕倚闌干今本生誤作伐

魏了翁

魏了翁字華父號鶴山邛州人慶元己未第二人
及策與真西山齊名道學宗派辭不作豔語長短
句一卷皆壽辭也菩薩蠻壽范靖倬云東窓五老
峰前月南窓九疊坡前雪推出侍郎山着君窗戶

間。○離騷鄉裡住。怯記庚寅度。挹取芷蘭芳。酌君
千歲觴。又鴈鵠天壽范靖州云。誰把璇璣運化工。
參旗又挂玉梅東。三三律管聲餘亥。九九玄經卦
起中。又水調換頭云。玉圍腰。金繫肘。繡籠鞍。宋代
壽辭。無有過之者。

吳毅甫

吳毅甫。名潛。號履齋。嘉定丁丑狀元。爲賈以道所
陷。南遷。有履齋詩餘行世。有送李御帶祺一辭。報
國無門空自怨。濟時有策從誰吐。亦自道也。李祺

號竹湖亦當時名士所著有春秋王霸列國分紀
予得之於市肆故書中乃爲傳之亦奇事也并附
見此

履齋贈妓辭

吳履齋有贈建寧妓女賀新郎辭集中不載見於
小說今錄于此可意人如玉小簾櫳輕勾淡倚道
家粗束長恨春歸無尋處全在波明黛綠看冶葉
倡條渾俗比似江梅滿有韻更臨風對月斜依倚
看不足詠不足○山屏半掩春山簇正輕寒夜永

花睡半欹殘燭。縹緲九霞光裡。夢香在衣裳。膩蘂
又只恐銅壺聲促。試問送人歸去後。對一奩花影。
垂金粟。腸已斷。恨難續。

向豐之

向豐之號樂齋。有如夢令一辭云。誰伴明窓獨坐。
我和影兒兩個。燈盡欲眠時。影也把人拋躲。無那
無那。好箇恹恹的我。辭似俚而意深。亦佳作也。

毛开

毛开小辭一卷。惟予家有之。其滿江紅云。潑火初

收。秋千外輕煙漠漠。春漸遠。綠楊芳草。燕飛池閣。
已著單衣寒食後。夜來還是東風惡。對空山寂寂。
杜鵑啼。梨花落。○傷別恨。閒情作。十載事驚如昨。
向花前月下。共誰行樂。飛蓋低迷南苑路。滿裙悵。
望東城約。但老來憔悴。惜春心。年年覺。此作亦佳。
聊記于此

驀山溪

葛魯卿有驀山溪一曲。詠天穿節郊射也。宋以前
以正月二十三日爲天穿節。相傳云。女媧氏以是

日補天。俗以煎餅置屋上，名曰補天窠。今其俗廢久矣。辭云：春風野外，卵色天如水。魚戲舞綃紋，似出聽新聲。北里追風駿足，千騎卷高門。一箭過，萬人呼。鴈落寒空裡。○天穿過了。此日名穿地。橫石俯清波。競追隨新年樂事。誰憐老子，使得縱遨遊。爭捧手。乍憑肩。夾路遊人醉。醉不甚工，而事奇，故拈出之。卵色天，用唐詩。殘霞感水魚鱗浪。薄日烘雲卵色。天之句。東坡詩亦云：笑把鵝夷一樽酒，相逢卵色五湖天。今刻蘇詩，不知出處。改卵色爲柳。

色非也。花間辭。一方卯色。楚南天。注以卯爲卯亦非。

張卽之書莫崙辭

聽春教燕。顰鶯訴。朝朝花困風雨。六橋忘却清明後。碧盡柳絲千縷。蜂蝶侶。正閒覓閒花閒草。閒歌舞。最憐西子。尚薄薄雲情。盈盈波淚。點點舊眉嫵。○流紅記空泛秋宮怨句。才色何處嬌妒。落紅無限。隨風絮。詩恨有誰曾過。堪恨處。恨前度花信催。花去東君暗苦。更多燭多情多愁。杜宇多訴。斷腸

語○此宋人莫崙之辭張卽之書孫生顯祖家藏
墨跡如新而字極恠錄其辭於此卽之號樗寮莫
崙號若山

寫辭述懷

扶風馬大夫作辭述懷聲寄滿庭芳云雲點疎髯
霜侵衰鬢去年猶勝今年一迴老矣堪歎又堪憐
思昔青春美景無非是月下花前誰知道金章紫
綬多少事憂煎○侵晨騎馬出風初暴橫雨又淒
然想山翁野叟正爾高眠更有紅塵赤日也不到

松下林邊如何好。吳淞江上開了釣魚船。大夫名
晉字孟昭嘗爲官任。

岳珂祝英臺辭

岳珂北固亭祝英臺近填辭云。澹煙橫。層霧歛。勝
槩分雄。占月下。鳴榔。風急怒濤颭。關河無限清愁。
不堪臨檻。正雙鬢。秋風塵染。○滂登覽。極目萬里。
沙場事業。頻看劍。古往今來。南北限天塹。倚樓誰
弄新聲。重城正掩。歷歷數西州。更點此辭。感慨忠
憤與辛。幼安千古江山一辭。相伯仲。

蘇雪坡贈楊直夫辭

蘇雪坡贈楊直夫名棟青神人辭云允文事業從容了。要岷峨人物後先相照。見詭君王曾有問。似此人才多少。况蜀珍先已登廊廟。但側耳聽新詔。按小說高宗曾問馬騏曰蜀中人才如虞允文者有幾騏對曰未試焉知允文亦試而後知也蘇與楊馬皆蜀人楊在眉山爲甲族直夫之妹通經學比於曹大家嫁虞氏生虞集爲鉅儒其學無師傳于母氏也此事蜀人亦罕知故著之○馬騏南部

人涓之孫

慶樂園辭

慶樂園韓侂冑之南園也。張叔夏著高陽臺辭云。
古木迷雅虛堂起。燕歡遊。轉眼驚心。南園東窓酸。
風掃盡芳塵。髣髴飛入平原草。最可憐。渾是秋陰。
夜沉沉。不信歸魂不到花深。○吹簫踏葉幽尋去。
任舫依斷石。袖褭寒雲。老桂懸香。珊瑚碎擊無音。
故園已是愁如許。撫殘碑。又却傷今。更關情。秋水
人家。斜照西林。

詠雲辭譏史彌遠

彌遠之比周于楊后也。出入宮禁。外議甚譁。有人作詠雲辭譏之云。往來與月爲儔。舒卷和天也敵。宋人言其本朝家法最正。母后宸賢。至楊后蕩然矣。

趙從橐壽賈似道陂塘柳

趙從橐陂塘柳云。指庭前翠雲金雨。霏霏香滿仙宇。一清透徹。渾無底。秋水也無流處。君試數。此樣襟懷。頗得乾坤住。閒情半許。聽萬物氤氲。從來形

色每向靜中覷。○琪花路。相接西池壽母。年年弦
月時序。荷衣菊佩尋常事。分付兩山容與。天證取。
此老平生可向青天語。瑤卮緩舉。要見我何心。西
湖萬頃。來去自鷗鷺。

賈似道壁辭

似道遭貶時人題壁云。去年秋。今年秋。湖上人家。
樂復憂。西湖依舊流。○吳循州賈循州。十五年間。
一轉頭。人生旋下休。此語視雷州寇司戶之句尤
警。吳循州謂履齋之貶。乃賈擠之也。

劉須溪

須溪劉辰翁元宵雨辭云角動寒譙看雨中燈市
寒意蕭蕭星毬明戲馬歌管雜鳴刁泥沒膝舞停
腰。燄蠟任風飄。更可憐紅啼桃臉綠頰楊橋。○當
年樂事朝朝曾錦鞍呼妓金屋藏嬌。圍香春醉酒
坐月夜吹簫。今老去倦歌謠嫌殺杜家喬。漫三杯
擁爐覓句斷送春宵。以意難忘按之可歌也

詹天游

詹天游以豔辭得名見諸小說其送童甕天兵後

歸杭齊天樂云相逢喚醒京華夢。吳塵暗斑吟髮。
倚擔評花。認旗沽酒。歷歷行歌奇跡。吹香弄碧。有
坡柳風情。逋梅月色。畫鼓江船。滿湖春水。斷橋客
○當時何恨。恁侶。甚花天月地。人被雲隔。却載蒼
煙招白鷺。一醉修江又別。今回記得。再折柳穿魚。
賞梅催雪。如此湖山。忍教人更說。此伯顏破杭州
之後也。觀其辭全無黍離之感。桑梓之悲。而止以
遊樂言。宋末之習。上下如此。其亡不亦宜乎。童甕
天失其名氏。有甕天腔語一卷。傳于今。云天游。又

有清平調云醉紅宿翠髻。顰烏雲。墜管是夜來不
睡。那更今朝早起。○東風滿。擗腰支。階前小立多
時。恰恨一番新雨。想應溼透鞋兒。蓋詠妓訴歎立
廳下也。又見石次仲集

鄧干江

金人樂府稱鄧干江望海潮爲第一。其辭云雲雷
天塹。金湯地險。名藩自古。皐蘭營屯。繡錯山形。米
聚。喉襟百二。秦關鏖戰血。猶殷見。陣雲冷落時有
鵬。盤。靜塞樓頭。曉月依舊。玉弓彎。○看看定遠西

還。有元戎閫令。上將齋壇。區脫晝空。毳零夕舉。伏
泉。又報平安。吹笛虎牙。聞且宴。陪珠履。歌按雲鬟。
來招英靈。醉魄長繞。賀蘭山。此辭全步驟沈公述
土王君貺一首。今錄于此。山光凝翠。川容如畫。名
都自古并州。簫鼓沸天。弓刀似水。連營百萬貔貅。
金騎走長楸。少年人一。一錦帶吳鉤。路入榆關。鴈
飛汾水。正宜秋。○近思昔日風流。有儒將醉吟。才
子狂遊。松偃舊亭。城高故國。空留舞榭歌樓。方面
倚賢侯。便恐爲霖去難留。好向恣攜弦管。宴蘭舟。

然千江之辭、鯨鯢、雄壯、何啻十倍過之、不止出藍而巳、

王子可

王子可、金明昌時人、或傳其仙去、事不可知、其生查子云、夜色明河淨、好風來千里、水殿謫仙人、皓齒清歌起、○前聲金箏中、後聲銀河底、一夜嶺頭雲、繞遍樓前水、辭之飄逸、高妙如此、固謫仙之流亞也、

滕玉霄

元人工于小令套數而宋辭又微惟滕玉霄集中
填辭不減宋人之工今略記其百字令一首云柳
顰花困把人間思怨樽前傾盡何處飛來雙比翼
直是同聲相應寒玉嘶風香雲捲雪一串驪珠引
阮郎去後有誰著意題品○誰料濁羽清商絳絃
急管猶自餘風韻莫是紫鸞天上曲兩兩玉童相
並白髮梨園青衿老傳試與留連聽可人何處滿
庭霜月清冷玉霄又有贈歌童阿珍瑞鷓鴣云分
桃斷袖絕嫌猜翠被紅衾與不乖洛浦乍陽新燕

爾巫山行雨左風懷。○手攜襄野便娟合。背抱齊宮婉孌懷。玉樹庭花千載曲。隔江唱罷月籠階。益鄭櫻桃解紅兒之流也。用事甚工。子同年吳學士仁甫喜誦之。

牧菴辭

姚牧菴醉高歌辭云。十年燕月歌聲。幾點吳霜。髮影西風吹起。鱸魚興。已在桑榆暮景。○榮枯枕上三更。傀儡場中。四并人生。幻化如泡影。幾個臨危自省。○牧菴一代文章巨公。此辭高古。不減東坡。

稼軒也

元將填辭

元將紇石烈子仁上平南辭云。蠶鋒搖螳臂振舊
盟寒恃洞庭彭蠡狂瀾天兵小試萬蹄一飲楚江
乾捷書飛上九重天春滿長安○舜山川周禮樂
唐日月漢衣冠洗五州妖氣關山已平全蜀風行
何用一泥丸有人傳喜日邊都護先還此亦

江西烈女辭

戴石屏薄遊江西，有富翁以女妻之，留三年，恩歸，
自言曾娶婦，翁怒，女宛曲解之，盡以嫁奩贈行，仍
餞以辭，自投江而死。其辭曰：惜多才，憐薄命，無計
可留汝，揉碎花牋，忍寫斷腸句。道傍楊柳依依，千
絲萬縷，抵不住一分愁緒。捉月盟言，不是夢中語。
後回君若重來，不相忘處，把杯酒澆奴墳上土。嗚
呼女則烈矣，戴尚得爲人類也乎？世俗有諺辭云：

孫飛虎好色、柳盜跖貪財、這賊牛兩般都愛、石屏
之謂與、出桂花叢、談馮翊子伏著、

辭品卷之五終

辭品卷之六

成都楊慎升菴著

八詠樓

沈休文八詠詩語麗而思深後人遂以名樓照映
千古近時趙子昂鮮于伯機詩辭頗勝趙詩云山
城秋色靜朝暉極目登臨未擬歸羽士曾聞遼鶴
語征人又見塞鴻飛西流二水坡黎合南去千峰
紫翠圍如此溪山良不惡休文何事不勝衣鮮于
百字令云長溪西注似延平雙劍千年初合溪上

千峰明紫翠。放出羣龍頭。角。瀟灑雲林。微茫煙草。
極目春州闊。城高樓迥。恍然身在寥廓。○我來陰
雨兼旬。灘聲怒。日日東風惡。須待青天明月夜。一
試巖維佳作。風景不殊。溪山信美。處處堪行樂。休
文何年年。多病如削。二作結句略同。稍含微意。不
專爲詠景發。予故取而著之。

杜伯高三辭

杜旟字伯高。蘭亭詩爲世所稱。樂府亦佳。酹江月
賦石頭城云。江山如此。是天開萬古東南王氣。一

自髯孫橫短策。坐使英雄鵲起。玉樹聲消。金蓮影
散。多少傷心事。千年遼鶴。併疑城郭非是。○當日
萬駟雲屯。潮生潮落處。石頭孤峙。人笑褚淵今齒
冷。只有袁公不死。斜日荒煙。神州何在。欲墮新亭
淚。元龍老矣。世間何恨餘子。摸魚兒。湖上賦云。放
扁舟。萬山環處。平鋪碧浪。千頃。仙人憐我。征塵久
借。與夢遊清枕。風乍靜。望兩岸。羣峰倒浸。玻璃影。
樓臺相映。更日薄煙輕。荷花似醉。飛鳥墮寒鏡。○
中都內羅綺。千街萬井。天教此地。幽勝。仇池仙伯。

今何在。隄柳幾眠還醒。君試問此意。只今更有誰
人領。功名未竟。待學取鴟夷。仍携西子。來動五湖
興。驀山溪賦春云。春風如客。可是繚華主。紅紫未
全開。早綠遍江南千樹。一番新火。多少倦遊人。纖
腰柳。不知愁。猶作風前舞。○小闌干外。兩兩幽禽
語。問我不歸家。有佳人天寒日暮。老來心事。只有
春知。江頭路。帶春來。更帶春歸去。

徐一初登高辭

徐一初登高摸魚兒。辭對茱萸。一年一度龍山今

在何處。參軍莫道無勲業。消得從容尊俎。君看取。
便破帽飄零也。傳名千古。當年幕府。知多少時流。
等閒收拾。有箇客如許。○追往事。滿目山河晉土。
征鴻又過邊徼。登臨莫苦。高層望。怕見故宮禾黍。
觴綠醕。澆萬斛牢愁。泪閣新亭雨。黃花無語。畢竟
是西風披拂。猶識舊時主。亦感慨之作也。

南澗辭

韓南澗題采石蛾眉亭辭云。倚天絕壁直下江千
尺。天際兩蛾橫。黛愁與恨幾時極。○暮潮風正急。

酒闌聞塞笛。試問謫仙何處。青山外。遠煙碧。此霜
天曉角調也。未有能繼之者。

高竹屋蕪堤芙蓉辭

高竹屋。詠蘇堤芙蓉。菩薩蠻辭。紅雲半壓秋波急。
豔妝泣露啼嬌色。幽夢入仙城。風流石曼卿。○官
袍呼醉醒。休捲西風錦。明日粉香殘。六橋煙水寒。
念奴嬌祝英臺近

德祐乙亥。太學生作念奴嬌云。半堤花雨對芳辰。
消遣無柰情緒。春色尚堪描畫。在萬紫千紅塵土。

鵬促歸期。鶯收倭舌。燕作畱人語。遶闌紅藥。韶華
惜此孤主。○真箇恨東風。幾番過了。不似今番苦。
樂事實。心磨滅盡。忽見飛書傳羽。湖水湖煙。峰南
峰北。總是堪傷處。新塘楊柳。小橋猶自歌舞。又祝
英臺近云。倚危欄。斜日暮。驀驀甚情緒。穉柳嬌黃。
全未禁風雨。春江萬里雲濤。扁舟飛渡。邨更寒鴻
無數。○嘆離阻。有恨落天涯。誰念孤旅。滿目風塵。
冉冉如飛霧。是何人惹愁來。那人何處。怎知道愁
來又去。

文山和王昭儀滿江紅辭

王昭儀之辭傳播中原。文天祥讀至末句。嘆曰。惜也。夫人于此。少商量矣。爲之代作一篇云。試問琵琶胡渺如。怎生風色。寂昔是姚黃一朶。移根仙闕。王母憐闌珊。寔罷仙人淚滿金盤側。聽行宮半夜雨淋鈴。聲聲歇。○彩雲散。香塵滅。銅駝恨。那堪說。想男兒慷慨。嚼穿齧血。回首昭陽離落日。傷心銅雀迎新月。弄妾身。不願似天家。金甌缺。又和云。燕子樓中。又推過幾番秋色。相思處。青年如夢。乘鸞

仙闕肌玉暗銷衣帶緩。淚珠斜透花鈿側。最無端。
蕉影上窗紗。青燈歇。○曲池合。高臺滅。人間事。何
堪說。向南陽。肝上滿襟清血。世態便如翻覆雨。妾
身元是分明月。笑樂昌。一段好風流。菱花缺。

附王昭儀辭

太液芙蓉渾不似。舊時顏色。曾記得。恩承雨露。玉
樓金闕。名播蘭簪妃后裡。暈潮蓮臉。君王側。急一
朝。鼙鼓揭天來。解華歇。○龍虎散。風雲滅。千古恨。
憑誰說。對山河百二。汨霏襟血。驛館夜驚塵土夢。

宮車晚碾開山月。願嫦娥相顧肯相容。隨圓缺。

徐君寶妻辭

岳州徐君寶妻某氏。被虜來杭。居韓蘄王府。自岳至杭。相從數千里。其主者數欲犯之。而終以巧計脫。蓋某氏有令姿。主者弗忍殺之也。一日主者怒甚。將卽強焉。因告曰。俟妾祭謝先夫。然後乃爲君婦。不遲也。君笑怒爲主者喜諾。某氏乃焚香再拜默祝。南向飲泣。題滿庭芳辭一闕于壁上。書已投大池中。以死辭云。漢上鯨華。江南人物。尚遺宣政。

風流綠窓朱戶。十里爛銀鈎。一旦刀兵齊舉。旌旗
擁百萬貔貅。長驅入歌樓舞榭。風捲落花愁。○清
平三百載。典章文物。掃地都休。幸此身未北。猶客
南州。破鑑徐郎何在。空惆悵。相見無由。從今後。斷
魂千里。夜夜岳陽樓。

傅按察鵬頭綠

元時有傅按察者。嘗作鵬頭綠。一辭悼宋云。靜中
看記。昔日淮山隱隱。宛若虎踞龍盤。下樊襄。指揮
湘漢。鞭雲騎。圍繞三千。勢不成三。時當混一。過唐

之數不爲難。陳橋驛孤兒寡婦。久假當還。○挂征
帆。龍舟催發。紫宸初卷朝班。禁庭空。土花暈碧。輦
路悄。訶喝聲乾。縱餘得西湖風景。花柳亦凋殘。去
國三千。游仙一夢。依然天淡。夕陽間。昨宵也。一輪
明月。還照臨安。

楊復初南山辭

楊復初築室南山。以村居爲號。凌彥翀以漁家傲
辭壽之云。采芝步入南山道。山深宛似蓬萊島。聞
說村居詩思好。還被惱。蒼苔滿地無人掃。○載酒

亭前松合抱。客來便許同傾倒。玉兔已將靈藥搗。
秋意早。月華長似人難老。復初和辭云。當時承望
求仙道。那知薄命如郊島。留得殘生猶自好。多懊
惱。塵緣俗慮何時掃。○子已成童無用抱。醉眠任
使和衣倒。今歲砧聲秋未搗。涼氣早。看來只恐中
年老。瞿宗吉和辭云。喜來不涉邯鄲道。愁來不竄
沙門島。惟有村居閒最好。無事惱。苔階竹徑頻頻
掃。○有酒可斟琴可抱。長年擬看三松倒。日內靈
砂親自搗。歸隱早。朝廷未放玄真老。宗吉旣和此

辭而復序云舊譜皆以仄聲起歐公呼范文正爲
窮塞主首句所謂塞上秋來者正此格也他如王
荊公之平岸小橋千嶂抱周清真之幾日春陰寒
惻惻謝無逸之秋水無痕清見底張仲宗之鉤笠
披雲青嶂遶亦皆如是今二公皆以平聲易之特
著此以俟知音爾

凌彥翀無俗念

凌彥翀作無俗念辭云等閒屈指筭今來古往誰
爲英雄耳目聰明天賦予怎肯虛生滅去燕來鴻

飛鳥走兔。世事何時換。風波境界大。川不用頻漲。
○空踏遍。萬戶千門。五湖四海。一樣中秋月。正面
相看。君記取。全體本來無缺。空裡非空。夢中是夢。
莫向癡人說。須騎鶴。夜深朝禮金闕。又蝶戀花。辭
云。一色杏花三百樹。菲屋無多。更在花深處。旋壓
小槽留客住。舉杯忽聽黃鸝語。○醉眼看花花亦
舞。風妬殘紅。飛過鄰牆去。恰似牧童遙指處。清明
時節紛紛雨。辭格清逸。一洗鉛華。非駢金儷玉者
比也。

瞿宗吉西湖秋泛

宗吉西湖秋泛。滿庭芳。辭露葦催黃。煙蒲駐綠。水
光山色相連。紅衣落盡。辜負採蓮舫。點檢六橋楊
柳。但幾箇抱葉殘蟬。秋容晚。雲寒鴈背。風冷鷺鷥
肩。○華筵容易散。愁添酒量。病減詩顛。況情懷。冲
澹。漸入中年。掃退舞裙歌扇。盡付與一枕高眠。清
閒好。腕中露髮。仰面看青天。又西湖四時望江南。
辭西湖景。春日最宜晴。花底管弦公子宴。水邊羅
綺麗人行。十里按歌聲。○西湖景。夏日正堪遊。金

勒馬嘶垂柳岸。紅妝人泛採蓮舟。驚起水中鷗。
西湖景。秋日更宜觀。桂子岡。鬱金粟富。芙蓉洲渚。
綵雲間。爽氣滿山前。○西湖景。冬日轉清奇。賞雪。
樓臺評酒價。觀梅園圃訂春期。共醉太平時。

瞿宗吉鞋盃辭

楊廉夫嘗訪瞿士衡以鞋盃行酒命其姪孫宗吉
詠之。宗吉作沁園春以呈廉夫大喜。卽命侍妓歌
以侑觴。辭云。一掬嬌春。弓樣新裁。蓮步未移。笑書
生量窄。愛渠儘小。主人情重。酌我休遲。醞釀朝雲。

斟量暮雨。能使麴生風味奇。何須去。向花塵留蹟。
月地偷期。○風流到處便宜。便豪吸雄吞。不用辭。
任凌波南浦。惟誇羅襪。賞花上苑。祗勸金卮。羅帕。
高擎銀瓶低注。絕勝翠裙深掩時。華筵散柰此心。
先醉。此恨誰知。

馬浩澗著花影集

馬浩澗著花影集自序云。予始學爲南辭。漫不知
其要領。偶閱吹劍錄中。載東坡在玉堂日。有幕士
善歌。坡問曰。吾辭何如。柳耆卿對曰。柳郎中辭宜

十七八女孩兒。按紅牙拍歌。楊柳岸曉風殘月。學
士辭。須關西大漢。執鐵板。唱大江東去。緣是求二
公辭而讀之。下筆略知蹊逕。然四十餘年。僅得百
篇。亦不可謂不難矣。法雲道人嘗勸山谷勿作小
辭。山谷云。空中語爾。予欲以空中語名其集。或曰
不文。改稱花影集。花影者。月下燈前。無中生有。以
爲假。則真。謂爲實。猶涉虛也。今漫摘數首。以便展
玩云。其商調少年遊云。弄粉調脂。梳雲掠月。次第
曉妝成。顰鵲籠邊。鞦韆牆裏。半晌不聞聲。○元來

却在瑤階下。獨自踏花行。笑摘朱櫻。微揜翠袖枝。
上打流鶯。行香子云。紅遍櫻桃。綠暗芭蕉。瑣窓深。
春思無聊。雙飛燕。懶百轉鶯嬌。正漏聲遲。簾影靜。
篆香飄。○惜月前宵。病酒今朝。有誰知。臂玉微銷。
封題錦字。寄與蘭麝。恨樹重重。雲渺渺。水迢迢。春
夜生查子云。燒罷夜香時。獨立簾兒下。真個可憐。
宵。一刻千金價。○啼痕不記行。暗滿鮫綃帕。蝶宿
牡丹叢。月轉鞦韆架。春日海棠春云。越羅衣。薄輕
寒透。正蕙閣風簾飄繡。無語小鶯鶯。有恨垂楊瘦。

○桃花人面應依舊。憶卅日。擎漿時候。添得暮愁。
牽。只爲秋波溜。鳳凰臺上。憶吹簫云。淡淡秋容。澄。
澄。夜景。娟娟。月挂梧桐。愛簫聲。縹緲。簾影玲瓏。彩。
鳳。銜書未至。玉宇靜。香霧空濛。涼如水。翠苔凝露。
其樹吟風。○匆匆年華暗換。嗟舊懽成夢。芳髻飛。
蓬。想清江泛鷁。紫陌遊驄。應念佳期虛負。瞻素彩。
感慨相同。凝情人。誰家搗衣。砧杵丁東。青玉案云。
平川渺渺。花無數。明鏡裡。孤舟度。花下美人。和笑。
顧。問郎。莫似乞漿崔護。別久來。何暮。○盈盈羅襪。

凌波步。眉月連娟。髻如霧。人世光陰。花上露。勸郎
休去。再來須誤。個是桃源路。中秋鵲橋仙云。不寒
不暑。無風無雨。秋色平分佳節。桂花香散。夜涼生
小樓上。簾兒高揭。多愁多病。閒憂閒悶。綠髻紛
紛。成雪。平生不作負恩人。惟負了。今宵明月。九日
金菊對芙蓉云。過鴈行低。鳴蜩韻急。紛紛葉下亭
皋。向霜庭看菊。鷗館題糕。依然賓主。東南美。勝龍
山迢遞登高。繡屏孔雀。金樞螃蟹。銀鑊葡萄。痛
飲鯨卷波濤。笑百年春夢。萬事秋毫。問臺前戲馬。

海上連鰲。當時二子今安在。乾坤大容我。麈尾四絃裂帛。雙鬟舞雪。左手持螯。梅花東風第一枝云。餌玉餐香。夢雲情月。花中無此清瑩。儼然姑射仙人。華珮明璫。新整五銖衣薄。應怯瑤臺淒冷。自駢鸞來下人間。幾度雪深煙暝。孤絕處。江波流影。顛顚也。春風銷粉。相思千種。閒愁聲聲禽啼。醒西湖東閣。休說當時風景。但留取一點芳心。他日調羹金鼎。落花滿庭芳云。春老園林。雨餘庭院。偏惹蝶駭鶯猜。鶯紅皺白。狼藉滿蒼苔。正是愁腸欲斷。

朱箔外。點點飄來。分明似身輕飛燕。扶下避風臺。
○當初珍重意。金錢競買。玉砌新栽。更翠屏遮護。
羯鼓催開。誰道天機繡錦。都化作紫陌塵埃。紗窓
裡。有人憐惜。無語托香腮。

馬浩瀾辭

馬浩瀾。洪仁和人。號鶴窓。善詩詠。而辭調尤工。皓
首韋布。而含吐珠玉。錦繡胸腸。褒然若貴介王孫
也。嘗題許應和松竹雙清扇景辭云。剪蒿萊。曾將
雙翠親裁。旋添成園林佳勝。依稀嶰谷。徂徠。鳳飛

過文章燦爛。蛟騰攫鱗甲。毡毳剉節題詩。收花釀
酒。髻粘香粉。袖粘苔。無人識棟梁之具。管籥之才。
蔭亭臺儘多風月。清無半點塵埃。○竿期截六鼇
連舉。巢堪托孤鶴時來。色瑩琅玕。脂凝琥珀。笑他
門柳與庭槐。蕭郎去。畢宏已老。誰富寫生才。君看
取歲寒三友。只欠梅開。蓋多麗辭也。許東溟以爲
可追蹤。康伯可。可謂信然。又題梅花江城引云。雪
晴閒覽。瘦筇扶過西湖。訪林逋。湖上天寒。草樹盡
凋枯。忽見瓊葩光照眼。仙格調。玉肌膚。○夜空雲

靜月輪孤。巧相摹。海濤圓。時聽枝頭。嗚嘶翠禽呼。
縱有明珠三百琲。知似得此花無。清氣逸發。瑩無
塵想。又題許東溟小景。昭君怨云。路遠危峰斜照。
瘦馬塵風。衣帽此去向蕭關。向長安。○便坐紫微
花底。只似黃糧夢裡。三徑易生苔。早歸來。言有盡
而意無窮。方是作者。徐伯齡言。鶴牕與陸清溪偕
出菊莊之門。而清溪得詩律。鶴牕得辭調。異體齊
名。可謂盛矣。

馬浩瀾念奴嬌

馬浩瀾念奴嬌辭東風輕軟。把綠波吹作縠紋微。
縠彩。觴亭亭寬似屋。載得玉壺芳酒。勝景天開。佳
朋雲集。樂繼蘭亭後。珍禽兩兩驚飛。猶自回首。○
學士港口桃花。南屏松色。蘇小門前柳。冷翠柔金
紅綺幔。掩映水明山秀。閒試評量。總宜圖畫。無此
丹青手。歸時侵夜。香街華月如晝。

聶大年辭附馬浩瀾和

聶大年嘗賦卜算子二首。蓋自况也。辭云。楊柳小
蠻腰。慣逐東風舞。學得琵琶出教坊。不是商人婦。

○忙整玉搔頭。春筍纖纖露老。却江南杜牧之。懶
爲秋娘賦。粉淚涇鮫綃。只恐郎情薄。夢到巫山第。
幾峰酒醒。煙花落。○數日尚春寒。未把羅衣著。眉
黛含顰。爲阿誰。但悔從前錯。馬浩瀾和云。歌得雪
兒歌舞得。覓裳舞。料想前身跨鳳仙。合作蕭郎婦。
○顏色雪中梅。淚點花稍露。雲雨巫山十二峰。未
數高唐賦。花壓髻雲低。風透羅衫薄。殘夢宵騰下
翠樓。不覺金釵落。○幾許別離愁。猶自思量著。欲
寄蕭郎一紙書。又怕歸鴻錯。

一枝春守歲辭

守歲之辭雖多，極難其選。獨楊守齋一枝春最爲近世所稱。辭云：竹爆驚春，競喧闐。夜起千門，簫鼓流蘇帳暖。翠鼎緩騰香霧。停盃未舉。柰剛要送年新句。應自賞歌清字圓。未誇上林鶯語。○從他歲窮日暮。縱閒愁怎減。劉郎風度。屠蘇辨了。迤邐柳忻梅妬。宮壺未晚。早驕馬繡車盈路。還又把月夕花朝。自今細數。

鬪草辭

春日婦文喜爲鬪草之戲黃子常綺羅香辭云綃
帕藏春羅裙點露。相約鶯花叢裡。翠袖拈芳。香沁
荀芽纖指。偷摘遍綠。逕煙霏。悄攀下。畫闌紅紫。掃
花堦。褥展芙蓉。瑤臺十二降仙子。○芳園清晝。乍
永亭上。吟吟笑語。妬穠誇麗。奪取籌多。贏得玉璫
瑜珥。凝素靨香粉。添嬌映黛眉。淡黃生喜。綰胸帶
空繫。宜男情郎歸也未。

賣花聲

黃子常賣花聲辭云。人過天街曉色。擔頭紅紫滿。

筠篴浮花浪蕊。畫樓睡醒。正眼橫秋水。聽新腔。一
回催起。○吟紅斗白。報得蜂兒知未。隔東西餘音
軟美。迎門爭買。早斜簪雲髻。助春嬌。粉香簾底。喬
夢符和辭云。侵曉園丁。叫道嫩紅嬌紫。巧工夫攢
枝餽蕊。行歌佇立。酒洗粧新水。捲香風。看街簾起。
○深深巷陌。有箇重門開未。忽驚他尋春夢美。穿
牕透閣。便憑伊喚取惜花人在誰根底。

梁貢父木蘭花慢

梁貢父曾燕京人。大德初爲杭州路總管。政事文

學皆有可觀。嘗作西湖送春。木蘭花慢。辭云。問花。
花不語。爲誰落。爲誰開。筭春色。三分半。隨流水。半。
入塵埃。人生能幾歡笑。但相逢。樽酒莫相推。千古。
幕天席地。一春翠繞珠圍。○彩雲回首。暗高臺。煙。
樹渺。吟懷。拚一醉。留春。留春不住。醉裡春歸。西樓。
半簾斜日。惟嚮春燕子。却飛來。一枕青樓好夢。又。
教風雨驚回。此辭格調俊雅。不讓宋人也。

花倫太史辭

杭州花倫年十八。黃觀榜及第三人。初讀卷官進。

卷以花倫第一、練子寧第二、黃觀第三、御筆改定以黃第一、練第二、花第三、南京諺有花練黃、黃練花之語、故後人猶以花狀元稱之、其題科名記及登科錄皆以黃練二公死革除之難剗毀、故相傳多誤、花有辭藻、其後謫戍雲南、有題楊太真畫圖水仙子一闕云、海棠風梧桐月、荔枝塵霓裳舞、翠盤嬌繡嶺春、錦棚嬉金釵信、香囊恨痴三郎、泥太真馬嵬坡血污遊魂、楊柳眉侵顰黛損、芙蓉面零脂落粉、牡丹芽剪草除根、其風致不減元人小山

甜齋輩、滇人傳唱多訛其字、余爲訂之云、

鎖愁堅辭

鎖愁堅、西域人、扈宋南渡、遂爲杭人、代有詩名、愁堅尤善吟寫、成化間、遊苕城、朱文理座間、索賦其家假山、愁堅賦沉醉東風一闕云、風過處、香生院宇、雨收時、翠溼琴書、移來小朶峰、幻出天然趣、倚闌干、盡日披圖、謗說蓬萊本是虛、只此是神仙洞府、爲一時所稱、

辭品卷之六終

辭品拾遺

成都楊慎升菴著

卓稼翁辭

三山卓用字稼翁。能賦馳聲。嘗作辭云。丈夫執手。
把吳鉤。欲斷萬人頭。因何鐵石打。成心性。却爲花。
柔。君看項籍并劉季。一怒使人愁。只因撞虞姬。戚
氏豪傑都休。其爲人溺志可想。

王昂催妝辭

探花王昂榜下擇婿時。作催妝辭云。喜氣滿門闌。

光動綺羅香陌。行到紫薇花下。悟身非凡客。○不
須脂粉汚太真。嫌怕太紅白。留取黛眉淺處。共畫
章春色。

蕭軫娶再婚

三山蕭軫登第。榜下娶再婚之婦。同舍張任國以
柳稍青辭戲之曰。挂起招牌。一聲喝采。舊店新開。
熟事孩兒家。懷老子。畢竟招財。○當初合下安排。
又不豪門買數。自古道正身贊代。見任添差。

平韻憶秦娥

太學服膺齋上舍鄭文秀州人其妻寄以憶秦娥
云花深深一鈎羅襪行花陰行花陰閒將梅帶試
結同心日邊消息空沉沉畫眉樓上愁登臨海棠
開後望到如今此辭爲同舍者傳播酒樓妓館皆
歌之以爲歐陽永叔辭非也

劉鼎臣妻辭

婺州劉鼎臣赴省試臨行妻作辭名鷓鴣天云金
屋無人夜剪繒寶釵翻過齒痕輕臨行執手殷勤
送襯取蕭郎兩鬢青○聽祝付好看成千金不抵

此時情。明年宴罷。瓊林晚酒。面微紅。相映明。

易祓妻辭

易祓字彥章。潭州人。以優校爲前廊。久不歸其妻。
作一剪梅辭寄云。染淚修書寄彥章。貪做前廊忘。
却回廊。功名成遂。不還鄉。石做心腸鐵做心腸。
紅日三竿。懶畫妝。虛度韶光。瘦損容光。相思何日。
得成雙。羞對鴛鴦。懶對鴛鴦。

柔奴

東臯雜錄云。王定國嶺外歸。出歌者勸東坡酒坡。

作定風波序云王定國歌兒曰柔奴姓宇文氏眉目媚麗善應對家世住京師定國南遷歸余問柔廣南風土應是不好柔對曰此心安處便是吾鄉因爲綴此辭云常美人間琢玉郎天教分付點酥痕自作清歌傳皓齒風起雪飛炎海變清涼○萬里歸來年愈少微笑笑時猶帶嶺梅香試問嶺南應不好却道此心安處是吾鄉

美奴

茗溪漁隱曰陸敦禮藻有侍兒名美奴善綴辭出

有樽俎。每丐韻于坐客。頃刻成章。卜筭子云。送我
出東門。乍別長安道。兩岸垂楊鎖暮煙。正是秋光
老。○一曲古陽關。莫惜金樽倒。君向瀟湘我向秦。
魚鴈何時到。如夢令云。日暮馬嘶人去。船逐清波
東注。後夜最高樓。還肯思量人否。無緒無緒。生怕
黃昏疎雨。

李師師

李師師。汴京名妓。張子野爲製新辭。名師師令略
云。蜀綠衣長勝未起。縱亂雲垂地。正值殘英和月

陸寄此情千里秦少游亦贈之辭云看徧潁川花
不似師師好後徽宗微行幸之見宣和遺事甕天
厓語又載宋江潛至李師師家題一辭於壁云天
南地北問乾坤何處可容狂客借得山東煙水寨
來買鳳城春色翠袖圍香簌綃籠玉一笑千金值
神仙體態薄倖如何銷得○想蘆花灘頭蓼花汀
畔皓月空凝碧六六鴈行連八九只待金鷄消息
義膽包天忠肝蓋地四海無人識閒愁萬種醉鄉
一夜頭白小辭盛於宋而劇賊亦工如此

于湖南鄉子

張于湖送朱元晦行與張欽夫邢少連同集作南
鄉子一詞云江上送歸船風雨排空浪拍天賴有
清樽澆別恨淒然寶燭燒花看吸川。○楚舞對湘
弦暖響圍春錦帳毡坐上定知無俗客俱賢便是
朱張與少連此詞見蘭畹集觀楚舞湘弦之句及
朱文公雲谷寄友絕句云日暮天寒無酒飲不須
空喚莫愁來則晦翁於宴席未嘗不用妓廣平之
賦梅花又司馬公亦有艷辭亦何傷於清介乎

珠簾秀

姓朱氏行第四。雜劇爲當今獨步。駕頭花旦軟末
泥等悉造其妙。胡紫山宣慰嘗以沉醉東風曲贈
云。錦織江邊翠竹。絨穿海上明珠。月淡時。風清處。
都隔斷落紅塵土。一片閒情任卷舒。挂盡朝雲暮
雨。馮海粟待制亦贈以鴈鴒天云。憑倚東風遠映
樓。流鶯窺面燕低頭。蝦鬚瘦影纖纖。龜背香紋
細細浮。○紅霧斂。彩雲收。海霞爲帶。月爲鉤。夜來
捲盡西山雨。不著人間半點愁。蓋朱背微僂。馮故

以簾鉤寓意。至今後輩以朱娘娘稱之者。

趙真真楊玉娥

趙真真楊玉娥善唱音宮調。楊立齋見其謳張五

商正六

音隻漸小卿怨。因作鵲音天哨遍音要

孫兒煞。以詠之後曲多不錄。今錄前曲云。煙柳風
花錦作園。霜芽露葉玉裝船。誰知皓齒纖腰會。只
在輕衫短帽邊。○啼玉靨咽冰絃。五牛身去更無
傳。辭人老筆佳人口。再喚春風在眼前。

劉燕歌

劉燕歌善歌舞齊叅議還山東劉賦太常引以餞
云故人別我出陽關無計鎖雕鞍今古別離難况
隔斷蛾眉遠山○一樽別酒一聲杜宇寂寞又春
殘明月小樓閒第一夜相思泪彈至今膾炙人口

杜妙隆

杜妙隆金陵佳麗人也盧疎齋欲見行李匆匆
不果所願因題踏莎行於壁云雪暗山明溪深
早行人馬上詩成了歸來聞說妙隆歌金陵却比
蓬萊渺○寶鏡慵窺王容空好梁塵不動歌聲悄

無人知我此時春風。一枕松牕曉。

宋六嫂

宋六嫂小字同壽。元遺山有贈感粟工張翥兒辭
卽其父也。宋與其夫合樂妙入神品。宋善謳其
夫能傳其父之藝。滕玉霄待制嘗賦念奴嬌以贈
云。柳顰花困。云 離見第五卷。念奴嬌一名百子
令。

一分兒

分兒姓王氏京師角妓也。歌舞絕倫。聰慧無比。

一日丁指揮會才人劉士昌程繼善等於江鄉園
小飲王氏佐樽時有小姬歌菊花會南呂曲云紅
葉落火龍褪甲青松枯恠蟒張牙丁曰此沉醉東
風首句也王氏可足成之王應聲曰紅葉落火龍
褪甲青松枯恠蟒張牙可詠題堪描畫喜觥籌席
上交雜答刺蘇頻斟入禮廝麻不啻而伏上馬
一座歎賞由是聲價愈重焉